




H. XIII. 8




Novo-Tacim. Liter.~

937.  
I







Henrici Nicolai

1. Oratio de Protervia quadam Philosophica.
2. Miscellanearum Exercitationum Decades III.
3. Gymnasium Ethicum.
4. Irenicum sive de differentiis Religionum conciliandi  
Comentatio.



D. O. M. A.  
Miscellaneorum  
DECADIS III.  
EXERCITATIO IV.

Holl. 28

De

# IVSTITIA

UNIVERSALI ET LEGIBUS

Practico-Philosophica.

*Pro disputationis exercitio ad sententiarum  
collationem proposita*

In Gymnasio Gedanensi

PRÆSIDE

HENRICO NICOLAI

Phil: Professore Publico

*Respondentis partes expediente*  
DANIELE SEBALDO War-  
tenbergâ Silesio.

*Ad diem 7. Novembris. S. N.*


In Acroaterio Philosophico

Horis ab 7. matutinis.

---

GEDANI. Typographo GEORGIO RHETIO ex-  
scripta, ANNO 1637.







# De justitiâ uni- versali & legibus.

## I.

**A**Ristippum Cyrenaicæ sectæ Philosophū per-  
contatus Dionysius Sicilia Tyrannus, quid præ reli-  
quis hominibus exitium haberent Philosophi, re-  
sponsum tulit: *Ut & abrogatis universis legibus hone-  
stè in solidum compositeq; viverent, notante Erasmo 5. apo-  
phtegm. in Aristip. §. 8. Vulgus, vanis plerumq; occupatum,  
legum præscriptis arcetur à peccando, ac ut Poëta loquitur: O-  
derunt peccare mali formidine poenæ. Sed Philosopho fa-  
cem pro legibus ministrat ratio: Nec ideo recta agit, quòd leges  
præceperint, sed quòd illud suapte naturâ rectum esse, hoc in  
scelus incumbere, cognoscat. Quippe boni virtutis amore pec-  
care oderunt. Et Socratica libertas est, spontè ad bonum ferri,  
non præceptis cogi. Nihilominus ob vitiosa natura contagiū,  
quod ab ortu universi trahimus, legibus opus est, premia bo-  
nis addicentibus, poenas improbis. Mos & lex maculosum e-  
domuit nefas, & culpam poena premit comes, ait Lyri-  
cus l. 4. od. 5. Prisci cum prævalida & adulta vitia crebre-  
scere viderent, attentè legibus præcaverunt, ne ultrà malum  
proserperet. Accavendum sedulò, ne vel à Deo sancita, vel à  
majoribus reperta sancta leges, aut oblivione, aut quod flagi-  
tiosius, contemptu abolita, ampliorem peccandi licentiam sup-*



pedient. Eò ne procedatur, prudenter inter moralia habitus suppeditatur, ad obædientiam universarum legum disponens, & exercitio omnium virtutum hominem addicens. Justitia universalis ille dici solet, de quo Socrates ap. Xenophontem l. 4. serm: Socr: justitiam ait esse, legibus præstare obædientiam. Ejus indolem, & ex eo consecutanea, honestas leges, quæquæ ad hoc argumentum attinent, hac diatribæ, D E O benedicente, spectabimus.

2. Justitia universalis videndum est partim nomen, partim res. Nomen secundum homonymiam, Etymologiam, & Synonymiam. Homonymia, & in voce justitia, & in universalis, videnda. Justitia vox sumitur 1. Oratoriè & Historicè interdum, pro officio funebri defunctis exhibito. Sic justa persolvere dicimur, quando mortuis exequias paramus, sic dicta, quòd jure fiant his, qui viventes de nobis benè meruerunt: Interdum pro gratiâ & benignitate. Sic Terent. Heaut. a. 4. f. 1. peccavi frater. Nunc hoc te obsecro, quanto tuus animus est natu grandior, sit ignoscentior, ut mea stultitia in justitiâ tuâ sit aliquid præsidii. 2. Theologicè vel D E O tribuitur, vel hominibus. Deo tributa notat vel severitatem Dei, quâ peccata punit, quam justitiam vindicatricem dicimus, ut Rom. 1. v. 32. Quod contra Photinianos negantes, ut Socinum d. servat. p. 1. c. 1. Osterod. c. Tradel. p. 3. c. 1. p. 212. Smalcium. c. D. Frantz. d. 4. t. 25. & consentientiè his Westhemerum l. de Tropis in f. litteris. p. 184. latius probant Theologi, vel universalem in Deo reëctitudinem & bonitatem malitiæ oppositam, Psal. 11. v. 8. Psal. 36. v. 6. vel fidelitatem in promittendo & servando. 1. Joh. 1. v. 9. Psal. 36. v. 11. vel benignitatem Dei. Rom. 3. v. 20. 1. Joh. 1. v. 9. 1. Sam. 12. v. 7. vel simile quid. Hominibus tributa notat vel perfectam totius legis obædientiam, Matr. 5. v. 20. vel ju-

sti-



*justitiam, quâ coram Deo per Christum à peccatis absolvimur.*  
 Rom. 5. v. 17. vel *studium bonorum operum*, Matt. 6. v. 1.  
 Rom. 6. v. 13. Jacob. 1. v. 20. Esa. 64. v. 6. vel *externam*  
*justitiâ disciplinam*. Philip. 3. v. 6. 9. Vel *premium justitiæ*.  
*Quomodo Flacius Gen. 30 v. 33. accipit, Respondebit mihi*  
*justitia mea, i. e. premium justitiæ debitum.*

3. 3. Philosophicè vel Tropicè vel propriè sumitur.  
 Tropicè vel 1. metaphoricè, quomodo simulachra & um-  
 bras justitiæ in brutis repertas justitiâ dicimus. Sic Aelianus  
 1. 2. hist. an. c. 8. Delphinos vocat justos, quod æquè piscium  
 capturam partiantur, & leones 1. 5. c. 39. Hac justitiâ idolum  
 & umbra justitiæ est, quomodo umbras virtutum in brutis cõ-  
 cesimus d. 2. t. 5. Quomodo & prædones justè partiti inter se  
 prædam dicimus, ubi tamen in depredatione magna est injusti-  
 tia: & nimium rigorem in rebus servandis justitiâ vocamus,  
 ut cum dicitur, summa justitiâ summa injuria. Vel 2. Meto-  
 nymicè, sumendo signum pro signato, quomodo libros de ju-  
 stitiâ & jure agere dicimus, cum in libris propriè sibi descri-  
 ptiones & signa rerum signatarum, per voces significatarum.  
 Quomodo Logicam descriptam in systemate signum cognitio-  
 nis habitualis in mente Logici detenta vocamus, & Ethicum  
 systema signum repræsentativum habitus moralis in animo E-  
 thici fundati est. Homo propriè denominatur Ethicus & Lo-  
 gicus ex habitu mentis: Systema & licet impropriè & signote-  
 nus. Vel 3. Synechdochicè, cum justitiâ dicimus, quod  
 particula aliqua ejus est. Ut cum honestè quædam gesta bar-  
 baros interdum justos dicimus, cum habitu justitiæ careant.  
 Sic Arios Scythas justissimos Barbarorum vocat Curtius lib.  
 7. c. 6. Propriè pro habitu animi at justa volenda agendaq.  
 inclinante. Et hoc vel generaliter, quo ad quævis honesta in-  
 citamur agenda, quomodo justitiâ in se virtutes continet o-

*omnes, ita hic accipitur: vel particulariter, quo in bonis externis ad suum cuiq; justè tribuendū disponimur, ut cum iustitia cōmunitiva, distributiva, dici solet. Sic cum David se secundum iustitiam suam in certo casu judicari petit. Psal. 7. v. 9. & 17. v. 1. Priori modo hic accipitur: posteriori d. 8. traditur. Vox universalis notat interdum alicuid multis commune, de quibus dici potest, quomodo prædiciabilia dicuntur universalia: interdum aliquid universaliter in omnia agens & influens, quomodo DEUS & Sol cause universales dicuntur: Interdum universalem Medicinam, omnes morbos tollentem & sanitatem asservantem, quomodo Chymistis Vniversale dicitur: interdum aliquid ad multa se extendens, quæ velut ordinat & componit, ita iustitia universalis dicitur, partim ratione essentia, quæ tam latè funditur, quàm ipsa virtus, quomodo dicitur: Iustitia in sese virtutis continet omnes: partim ratione officij & efficacie, quia omnes virtutes particulares ad finem suum, publicum & commune bonum, referre docet. Non autem dicitur Iustitia universi virtus vel genere, quasi omnis virtutis genus esset: vel specie, quasi omnes virtutes ejusdem speciei essent, cum objecta & actus specie diversos habeant: Vel numero, q. omnes virtutes una numero essent, cum n. specie differant, multo magis n.mero different: Sed aggregatione conflata ex partibus diversarum specierum inter se connexis, & incertum respectum ordinatis. ubi qualibet pars essentialis sibi propriam retinet, & ordinando ad aliud magis ad hoc perficitur. Quod iustitiam Vniversalem facere ex his patebit.*

4. Etymologica vox iustitia Logica nulla, quia vox ultimè abstracta quæ reiquis, ut iusto, juri, denominationem dat, non aliundè ut i priore formâ denominationem habet. Logicè enim loquendo id prius in significandi ratione est, quod abstracti-simè significat, tanquam ultimè abstractum.

ut



ut nullum abstractius in suo genere tanquam formam agnoscat, unde denominationem sortiri queat. In hoc enim primā denominandi rationem invenit Logicus, & ad aliquod prius & superius ascendere nequit. Ita omnia accidentia & abstracta Metaphysica sunt ultimāte abstracta, & proinde prima forma denominantes, à quibus cetera, ut derivata, secundum rem denominantur. Ita justitia tanquam ultimò abstractum denominationem dat & subjecto denominato, ut homini justo, & effecto, ut juri, quod velut à justitiā procedit, tanquam lex, aut ars, ut Icti appellant, equi & boni. Grammatica & Juridica est à justo, & hoc à jure, quod ut paucioribus syllabis constans pro primitivo assumitur, justitia ut polysyllabum pro derivativo. Sed secundum rem & Logicam denominationem, quæ res & significata vocum, non syllabas, attendit, hæc invertenda sunt. Et sic negant Philosophi contra Ictos, ut Wessenbecium & alios, justitiam à jure etiam Logice & realiter derivari. V. D. J. Mart. l. 2. Eth. c. 15. Et ipse Ulpianus contrarium agnoscit l. 1. prin. ff. de just. & ju. Quem sequuntur Treutlerus d. l. t. i. Hunnius in Treut. Vol. I. d. l. q. i. alijs. Allusiva & apparens etymologia est vel à voce juxta, secundum quosdam, quod justitia juxta regulam inc-dat; V. Flacium in clau. Voc. justitia: Vel q. jurisstatu, ut Isidorus vult: vel per transpositionem literarum à visistendo, quod vim sistat, ut alijs volunt: Vel à jus sistendo, quod in eā jus & rectum sistatur, ut vult Hotomannus: Vocis universalis derivatio Logica est ab universalitate, quæ quomodo hic intelligenda, ante dictum: Grammatica ab universo, quod universum virtutum numerum comprehendat. Synonymia est, quā dicitur etiam justitia legalis, quod quæ à lege precipiuntur, ad commune civitatis bonum referre doceat: legitima, quod circa legitima à legibus instituta versetur: perfe-

*Est maximè ap. Aristot. 5. Nicom. c. 3. quòd non solùm proprium possessorem internè perficiat, sed & bonum suum ad alium & communem Reipubl. statum transferat, & in Publico officio omnia rectè ordinare doceat, ne oblatiis occasionibus homo ad vitia declinet: Obædientia universalis, quòd omnibus legibus honestis hominem obedire faciat. Periphrastice Lucifero & Hespero splendidior ap. Aristot. c. 1. & 4. Eudem. c. 5. ob eminentiam natura sue: bonum divinum & appetendum ob insignem utilitatem: Platoni anchora & fulcrum civitatis, &c. Interdum æquitas Græcè δίκαιοσύνη & δίκαιο à δίκαι & δίκαιο, quod quasi bipartitò & divisim in æquales partes opera diffindat & penset.*

5. Nomine viso res injustitiâ Vniversali videnda est & absolutè in reali positione, definitione, & effectis: & respectivè in diversitate & oppositione.

6. Politio just: Vn: est, quâ reverâ in Ethicis habitus aliquis dandus est ad exercitium omnium virtutum justè obediundum hominem disponens: Quod patet & artificialiter à perfectione hominis Ethicâ: Quia in Ethicis homo moraliter est perficiendus non solùm absolutè & sibi, ut per se honestus & moratus sit: sed & respectivè & aliis, ut honestatem suam etiam erga alios competenter exerceat, & vilegium justè ad publicum bonum eam ordinet, Quibus concordare actus suos in Reipubl. debere intelligat. E. & dandus in Ethicis habitus moralis disponens hominem non solùm absolutè, ut in se sit probus, quod facit Virtus moralis: sed & respectivè, ut probitatem erga alios exerceat, quod facit justitia Vniversalis. E. & de hac in Ethicis præcipiendum: & inartificialiter, testimonio experientia, quâ videmus, quosdam absolutè & pro se satis honestè se gerere, & tamen erga alios in conversatione publicâ non satis convenienter & justè se habere. V. t. 7. E. aliud præcisè est,



est, esse virtuosum in se, aliud, virtuosum se erga alium exhibere. Et sic dandus etiam habitus moralis, inclinans ad honestè se erga alium gerendum, quod iustitia Vniversalis facit. Quidam inter generales conditiones cuiusq; virtutis eam recensent, qua illam ordinet & velut constituat. Vt Amesius l. 2. medul. c. 2. n. 25. 26. 32. Sed rectius iustitia dirigens quid virtutum dicitur, quàm conditio, cum Keckerm. l. 1. Eth. c. 4. Dirigit iust. Vnivers. voluntatem ad obædientiã omnium legum, & exercendas justè omnes virtutes, & sic principium aliquod virtutis est, quomodo omne dirigens directo est instar principij: Conditio autem magis affectio aliqua rei est, quàm principium. Sic prudentia propriè dirigens quid virtutum est, non conditio. V. d. 3. t. 17. Respectu prudentia est virtus directã iustitia, unde & inter directas recensetur c. 1. Respectu reliquarum virtutum particularium est dirigens, non instar prudentia, sed habitus leges respicientiã.

7. Definitio sit: Iustitia Vniversalis est habitus moralis, hominem ad obædientiam omnium legum inclinans, & congruenter juri & legibus in societate civili vivere faciens. Ex genere dicitur habitus moralis. Habitus, quia faciliat operationem: moralis, quia ad actum moralem ut proximum finem tendit, non in nudã cognitione subsistit. Dicitur habitus moralis, non precisè virtus, Quia à virtute differt aliquot modis. I. Vniversali complexione, quia non iam virtus aliqua speciale objectum respiciens est, quàm virtutum omnium moralium complexus: docet enim universas virtutes secundum leges probè justèq; ad alterum in communitate publicã in salutem publicam exercere & applicare, unde & virtus Vniversa dicitur. Et propriè est principium dirigens virtutis moralis, non ipsa virtus moralis, ut sic. V. t. 6. 2. Respectus super virtutem additione. Virtus ut virtus, absolutum

lulum quid est, respiciens proprium possessorem ut subjectum, quod simpliciter probum & honestum in seipso facit, & bene agere inclinatur. Sed justitia præterea respectum addit, & virtutem ad alios ordinat, docetq; & honesta erga alium in societate justè exercere, facitq; ut non solum nobis probi simus, sed & tales nos alijs exhibeamus: Vt non solum virtutem pro nobis possideamus, sed & in ordine ad alium & commune bonum justè debiteq; eam exerceamus. Vnde vulgò dicitur bonum alienum. Potest enim quis privatum bonum esse, & de rebus suis honestè disponere: ut tamen se non decenter gerat, ubi cum alio negotij aliquid capiendum. Conf. th. 6. Sic potest quis in suis bonis non esse avarus, ut tamen, ubi ad magistratū veniat, incipiat publicis bonis inhiare, & peculatu commisso de illis direptere conetur. Vbi illud Biantis valebit: Officium ostendit virum, vel, Magistratus ostendit virum: Germani dicunt: Was der Mann kan / zeigt das Ampt an. Vt ergo & hic, & in omni actu ac conversatione, honestè justèq; se homo gerat, facit justitia universalis. Illa diffundit se & ad alios, & etiam, ubi major peccandi occasio est, affectus cohibet, ne ultra modum ferantur, sed & in administratione ad alium commune bonum in societate civili observent. 3. Legum Observatione. Virtus, ut virtus, honestum facit tenere absolute, posito, etiamsi nulla lex id facere jubens sit posita. Dictamen enim rectæ rationis prudenter determinans Philosopho est pro lege, c. I. Sed justitia imprimis ad obligationem omnium legum honestarum respicit, ut legibus honestis in Republ. positis sciat homo, se ad obædientiam omnium illarum vi justitiæ obligari, adeoq; faciat ea, quæ sunt præcepta legibus, fugiat prohibita. Vnde & in definitione dicitur, ad obædientiam omnium legum inclinans.

8. Ex differentiâ dicitur I. hominem ad obædientiam  
tiam



tiam omnium legum inclinans. In hoc differt à virtute  
 morali in genere, quæ dictamen rectæ rationis practicæ respicit:  
 Sed iustitia in super jus vel legem, quâ aliquid iustum & con-  
 veniens præcipitur. Vbi hic habitus inclinatur ad ordinem illum,  
 ut in respectu ad leges honestas sciat homo, se ad obædiendum  
 illis obligari. Vnde ex iustitiâ universali profluunt leges, &  
 ut objecta, & ut effecta, ut t. II. patebit. 2. Et congruenter  
 juri & legibus in societate civili vivere faciens. Leges de  
 omnib. virtutibus ad bonum commune pertinentibus præcipe-  
 re debent. Vnde iustitia universalis leges observans per omnes  
 virtutis species progreditur, quia omnes universim completi-  
 tur, nullam excludit: facitq., ut quævis virtus justè, decenter,  
 æquè, ab homine ad alium in societate communi exerceatur. In  
 societate civili, ut respectus habeatur ad alios, quibus cum in  
 societate nobis versandum. Alios intellige homines, supposita  
 & personas: Est enim *jo.* alius, qui vis, omnis, & simile nomen,  
 sumendum de personâ, non potentiâ aut facultate: quasi ju-  
 stitia universalis doceat in eodem supposito unam facultatem  
 obædire alicui, ut voluntas obædiat rationi, appetitus sensua-  
 lis voluntati, Quomodo Plaro 4. d. Rep. iustitiam in concen-  
 tu facultatum animæ consistere docet, eumq. secutus Ehemius  
 l. 5. d. prin. jur. c. 3. iustitiam aliam absolutam facit, quæ a-  
 nimæ vires & rectitudinem respiciat, aliam relativam, quæ  
 societatem humanam & Remp: Sed propriè iustitia dicitur ad  
 aliud suppositum, cui justè vivatur, ut docet Aristot. 5. Ni-  
 com. c. 3. Importat enim vox iustitiæ æqualitatem; æqualitas  
 autè propriè est inter supposita, & æquare proprium est suppo-  
 sitorum: analogicè facultatum. Absoluta est ipsa virtus nudè  
 & per se sumpta, quæ honesta est: & obædientia facultatis ad  
 facultatem est tropica & metaphorica, non propria, quæ respec-  
 tu legum & conversationis cum alio homine ab homine fit.

*Ita cum leges observantur, respectus ad commune & publicum bonum habetur. Leges enim de virtutibus omnibus precipientes ad publicum & commune bonum respiciunt, cujus gratiâ proponuntur, servantur, & defenduntur. Virtus ergo ad publicas leges observandas obligans, simul ordinem ad publicum bonum involvit, ut ejus gratiâ & intuitu per omnium virtutum decursum justè & aequè cum alio vivatur. Vt homo concordet legi ordinanti actus virtutum ad commune bonum: nec aliquid legibus aut honestati adversum quoquomodo committatur.*

9. *Quæri hic solet, an justitiam Universalem intellexerit Imperator, cum l. 1. inst. t. 1. Justitiam constantem & perpetuâ voluntatem definiit, jus suum cuiq; tribuendi, an particularem? In utramq; partem sunt sententia. Quidam Universalem intellexisse putant, Vt Bachovius in tit. 1. l. 1. Inst. n. 1. §. 3. Hunnius T. 1. in Treutl. d. 1. q. 6. Duarenus, Alciatus, Wesenbecius, Heigius, aliq; ap. Wesenerû prodr. jurisp. n. 12. Alij particularem definiisse putant. Treutl. d. 1. t. 1. Vol. 1. Contius & Donellus ap. Hunn. Forsterus, Schneidevinus, Corasius, Oldendorpius ap. Wesenerum c. 1. Et verius mihi videtur, si verba, jus suum cuiq; tribuendi, propriè sumi debent, quod in definitione omnino fieri debet. Aliud enim est, præcisè conformitatem vitæ ad Juris & legû præscriptum per se & essentialiter respicere, quod justitia universalis facit, ut th. 8. visum: aliud, jus suum cuiquè secundum præscriptum legis tribuere, quod particularis. Conformiter ad legem vivere potest, etiam qui nullum jus alteri debitum propriè & præcisè tribuit. Sic qui fortiter pugnat, sobriè ac temperanter sibi vivit, mitis & mansuetus est, secundum leges vivit, nec tamen propriè & in rigore Philosophico alteri jus suum tribuit, cum partim nullum habeat, cum quo*



quo versetur, sed absolute per se & sibi ita vivat: partim ci-  
tra alterius damnum aut injuriam timidus, intemperans, ira-  
cundus esse queat. Sic qui quotidie se ingurgitat, peccat contra  
jus, i. e. leges Reipublicæ, ut tamen per solum ingurgitare nulli  
proprie injuriam inferat. Ita si liberalis alteri ex liberalitate  
aliquid concedat, ad quod concedendum nullâ obligatione spe-  
ciali juris teneatur, ex justitiâ & æquitate Vniversali id ager,  
jus suum alteri tribuisse ex justitiâ dici non potest, quia alteri  
nullum jus ad hoc, quod concessum est, competi. Per acci-  
dens interdum evenire potest, ut justitia etiam Vniversalis jus  
suum alteri tribuat, quatenus particularem justitiam certo  
modo includit, & secundum illam etiam in societate vivendū  
leges præscribunt, & injuriâ alius per factum afficitur: ut cum  
intemperans cum alterius uxore consuevit, injustus est, & ma-  
rito, qui jus in illâ re habet, injuriam facit: & simul contra le-  
ges publicas Reipubl: peccat, quæ illud facere vetant: sed casu  
& ex eventu illud est, Quia justitia universalis cum particu-  
lari hic concurrat, non ex naturâ & essentiâ just: Vniversali,  
ut sic. Quæ autem eventualiter & ex casu fiunt, ipsis rerum  
essentijs & definitionibus eas exprimentibus, adscribi non pos-  
sunt. Aliud etiam est, disceptare de fine Jurisprudentiæ, an illa  
saltem justitiam particularem intendat, an & Vniversale o-  
mnium virtutum secundum leges exercitium, de quo suaviter  
quidam hic rhetoricantur, & nos non negamus: Aliud est, di-  
sceptare de definitione Imperatoris, quid ille in eâ complexus  
sit. Vbi negamus, verbis illis, jus suum cuiq; tribuere, justitiam  
Vniversalem comprehendendi posse, nisi admodum improprie &  
alienè definitio sit posita, quales aliàs in Jure non sunt infre-  
quentes, si ad definiendi dividendiq; artem, Logicâ, examinen-  
tur. Et satis incommode vox cuiq; ita extendetur, ut & pro-  
prium suppositum noceat, ut cuiq; suum tribuere compre-  
hen-

tendat etiam virtutem absolutam sibi & pro proprio supposito exercitam: Ut cum quis sibi temperanter vivit, patienter tolerat, modeste sentit, prudenter prospicit: Cum illud, cuiq̃, ex proprio significato, satis apertum respectum ad alium involvat, cum quo agendum. Et principia iuris non absolutam tantum virtutem requirant, quæ precipitur illo, honestè vivendum esse: sed & respectivam, quæ ad alium exercenda, ut, cuiq̃, suum tribuere. Et si cuiq̃, suum tribuere dicendus esset, qui pro se honestè viveret, ex opposito, qui inhonestè viveret, sibi injuriam facere dicendus esset, quod nemo admitteret. Nunquam enim inhonestas morum aut injuria dicitur, nisi per summum vocum abusum: aut aliquis in seipsum injurius esse potest, ut benè contra Platonem disputat Philosophus 5. Nicom. c. 15. Cum nemo spontè injuriam patiatur, inhonestas a. morum spontè ab homine assumatur.

10. Fuit definitio Iustitiæ: Universalis: Effecta ejus: sunt jura & leges, de quibus nunc consequenter dicendū. Nomen juris & legis variè sumitur. Vnde jus & objectum justitiæ & causa, & effectus, diversimodè dici solet. Jus notat interdum ipsam justitiam objectorum fundamentaliter in ipsis rebus honestis fundatam; sic justum dicimus, quicquid virtuosum; Hoc jus fundamentaliter sumptum dici possit: De quo V. Ciceron: l. i. d. leg. §. 42. 43. 45. 46. Interdum regulam operum, qualis est lex, præceptum, sententia judicis, dictamen prudentiæ & rationis, & quicquid in societatis usu à rectâ ratione præscribitur. Sic in illo Virgilij 1. Æneid: Remo cum fratre Quirinus iura dabant: Hoc jus normaliter sumptum dici possit: Interdum pro necessitudine & cognatione aliquâ, sic jus agnationis, affinitatis: Interdum locum juri dicundo consecratum, sic in jus vocare, i. e. ad tribunal & sedem prætoris: Interdum quidquid à prætore enuntiatur, etiamsi non  
jus,



*jus, sed injustum & violentū sit. Sic prator jus reddere dicitur: Interdum scientiam & peritiā regularum juris, quomodo juris Candidatos, Doctores, &c. dicimus, & jus artem (vel potius prudentiam) equi & boni definire solemus: Interdum facultatē morālē possidendi, habendi, aut agendi circa aliquod: quomodo jure suo uti dicimus, qui domum suam aut agrum elocat, vendit, donat, &c. Interdum justum & equum strictē dictum, h. e. debitum legale alteri ita reddendum, ut alter jus & actionem ad illud poscendum habeat. Dicitur jus strictē dictum, quia latē dictum omne debitum moralis cujusvis virtutis dici potest, etiam si alter actionem in illud non habeat. Sic veraciter loquendum alteri: tamen si contrā fiat, non habet alter actionem postulandi illud: Eleemosyna danda egeno, non tamen egenus jus aut actionem habet ad illam, si non datur, exigendam. Sic maximē in justitiā particulari sumitur jus: Interdum omne id, quod justē honestēq; ad legum conformitatem ab homine exerceri debet. Sic & secundo modo maximē hic sumitur. Lex sumitur interdum in scripturis largissimē pro omni doctrinā, interdum specialius pro doctrinā Veteris Testamenti, vel Moysi, vel omnium scriptorum V. T. Interdum pro constitutione Politie Judaice: Interdum pro legis maledictione, interdum strictissimē pro unā aliquā & particulari constitutione, interdum alio modo, quae exemplis persequentem vide D. Meisnerum l. l. d. leg. q. i. Hic sumitur pro regulā agendorum & omittendorum. Derivationem vocis alij à legendo, alij à ligando, alij à deligendo, alij ab intelligendo formant. Logicē vox est primitiva, aliam non agnoscens, unde Logicē derivetur: est enim ultimā abstracta, & cæteris à se denominatis derivationem suppeditat. Ut legali, legitimo, legifero, leguleio, &c. Synonymicē Grammaticē dicitur etiam statutum, jus, jussum, mandatum, sanc-*

*citum, decretum, praeceptum, rescriptum, regula, per translationem ab architectis sumptam, ad quam velut normam exploratur, quid in juris questione rectum, aequum, & verum sit. Conf. Senec. ep. II. Græcis  $\rho\epsilon\mu$  &  $\alpha\ \rho\epsilon\mu\epsilon\upsilon$ , quod aquæ dividat & administret res: vel  $\alpha\ \rho\omicron\sigma\varsigma$ , mens, quod  $\alpha$  mente divina & humanâ in urbes manet. Hebræis  $\text{עֲדֵרֶת}$ ,  $\text{תְּהִי$ , & in sacris varia nomina habet, de quibus Westheimerus de trop. scrip: in voce legis videatur. Germanis *gesetz* / *sagung* / *befehl* / *geboth* / &c. Periphrastice mens urbium vocatur.*

II. Priusquam ad realia legis explicandâ veniatur, velut in antecessum observentur sequentia. 1. Lex ac jus & effectus justitiæ, & causa, & objectum esse potest, habetq; respectum & causativum, & effectivum, & objectivum ad justitiâ, pro diversâ vocis acceptione & consideratione. Iustitiâ quatenus consideratur antecedenter, cum nondum lex est inventa, sed inveniendâ, est habitus ad honestum respectu legis vel condita vel condendâ servandum in societate inclinans. Ita est causa juris & legis, tanquam immediati effecti ab eâ resultantis, & habitus justitiæ iudiciumq; ex eâ deductum est causa legum & constitutionum honestarum. Oportet enim legeslatores esse justissimos & aequissimos, si iusta ac honesta ferre velint: & prius de ratione legis prudenter disceptandû, antequam lex ipsa feratur: Leges & iura sunt effectus justitiæ, à quâ promanant, & hoc modo justitiâ imprimis in moralibus spectari solet, ut rectè inquit Jac. Mart. l. 2. Eth. c. 15. non prout leges sunt causa justitiæ acquirendæ aut exercendæ, cum justitiâ etiam ante legem latam per propriam assuetudinem honestatis in homine esse possit, & per se sit habitus ab lege latâ vel ferendâ abstrahens, ut ante dictum: Quomodo dici solet: Iusto non est lex posita, quia spontè etiam



& sine lege ea, quæ sunt legis, facit. *Justitia considerata consequenter, quæ leges jam sunt inventæ, statuta, & à societate in usu applicanda; Ita est effectum legis & juris, & à lege tanquam normâ & causâ exemplari dirigente pendet, & secundum legis præscriptum in Republicâ exercetur. Hoc modo lex dirigit & judicem in judicando, ut justitia judicando administrata à lege tanquam effectus à causâ dependeat: & subditum in obtemperando, ut acta sua ad regulam juris componere sciat, & per crebras justæ exercitationes secundum leges occupatas, habitum justitiæ sibi introducat. Ita justitia magis in Jurisprudentiâ quàm Phil: morali spectatur. Et patet hinc, quid respondendum, quando queritur, An justitia sit à jure, an jussu justitiæ? Similiter lex est objectum justitiæ, quatenus consequenter ea comparanda, & ad præscriptum legis administranda est, Vbi legem tanquam objectum, quod in actum usumq; duci debet, respicit: Effectum, quatenus antecedenter ante legem datam ea in homine intelligitur, & ex cujus radice ad ipsas leges ferendas proceditur. 2. Lex potest esse effectum justitiæ & universalis & particularis. Universalis, quæ ad omnia honesta, quæ præcipit, inhonesta, quæ prohibet, se extendit. Sic & complectitur ea, quæ homini absolute pro se perfectionem & honestatem præstant, quod omnis virtus moralis per se spectata facit. Ita justitia Universalis ad obædientiam omnium legum honestarum disponere dicitur, c. 7. sive leges sint conditæ, sive condendæ, utroq; respectu justitia indifferenter disponit. Et ita leges commodissime just: Universalis subjunguntur, cum cætera disputationes sufficientes materias tractandas habeant. Particularis, quæ in particulari rerum externarum commutatione & distributione justum æquumq; servandum docet, & ne quis defraudetur, prohibet. Ita delegibus & in justitiâ particulari aliquid doceri possit.*

12. 3. De legibus pro vario respectu in varijs disciplinis doceri potest. Consideratur lex vel prout menti humana à principio creationis à Deo indita est, aut certa politia ad justum ordinem servandum ab eodem praescripta est, unde leges morales, ceremoniales, & forenses dicuntur, Ita in Theologicis de lege & Evangelio tractari solet: vel prout in certâ Republicâ lata dextrè interpretanda est, vel ad sonum litteræ, vel ad sensum bonæ consequentiæ: Ita ad Ictum pertinet, qui in primis leges civiles datas dextrè interpretari, casibus eventibus judiciosè accommodare, & controversias exortas conscientiosè ex illis dirimere debet: Hoc enim jurisprudentia, quæ prudentia Judiciaria est, munus est, legem latam legitimè interpretari, ap. Aristot. 6. Nicom. c. 8. Sicut legislatoria est, rationem legis indagare, aut ex ratione legem ponere. Ictus, quâ talis, non disputat de ferendâ lege, aut an ritè aut utiliter sit lata, aut quibus causis lata: Sed istis praesumptis circa sensum legis eruendum explicandumq. est occupatus, ut benè docent Hornejus 4. Eth. c. 3. n. 7. Arniseus l. 2. Polit. l. 3. n. 18. Ita & leges latas respuit, & in certâ politiâ assumptas. Erubescit enim sine legibus (sc. latis & assumptis,) loqui. §. consideremus. Nou. const. 18. c. 5. Esi lex dura est, sufficit illi, quòd ita scripta est: Vel prout determinatè ad certam Reipublica formam applicanda est, videndūq. an illi conveniat, an noxia sit: quomodo prudenter inducenda, conservanda, abroganda in hoc a. illo statu sit, cum alias leges poscat Democratia, alias Aristocratia & Monarchia. Ita de lege agere ad Politicum spectat, V. Aristotel. 2. Polit. c. 8. Vel prout generalis ejus natura sine determinatione ad certam Reip. formam in esse generali spectatur, origo & species legum indagantur, leges civiles in legem naturæ, lex naturæ in legem divinam, quantum fieri potest, reducuntur. Ita ad

Ethicum



Ethicum spectat de legibus tradere, earumque rationes ex intimâ Philosophiâ desumere, ut Cicero l. d. leg. §. 58. 59. seq. differit, h. e. ex ipsâ disciplinâ civili & morali, qua ex iustitiâ leges derivat. Hoc modo de lege hic præcipiendum. Sed in hac generalitate dupliciter adhuc lex spectari potest. 1. Absolutè & prorsus generaliter, ut abstrahit à iusto vel iniusto, licito vel illicito, honesto vel inhonesto: notatque præceptum imperans vel prohibens aliquid in vitâ generaliter, sive honestè sive inhonestè id fiat. Hoc significatum quidam hic usurpant, & ad legem ut sic, indifferenter se habere ajunt, an de licito imperet, an illicito. Vt Arnisaus l. 1. Polit. c. 18. Horneius l. 4. Eth. c. 3. n. 9. Elerus d. 11. Eth. t. 9. Quod partim exemplis legum iniquarum probant, quæ postea correctæ sunt: partim à naturâ Reipublicæ, cujus essentiam non ingrediuntur bonitas aut vitiositas, sed tanquam accidentia ad eam sunt: Ita nec essentiam legum ingrediuntur, ex quâ essentia Reipub. explicatur: partim exemplo civis directi à lege, qui potest esse bonus civis, & obædire legibus tyrannicis, ad earumque statuta se componere, ut tamen non sit bonus moraliter. Vnde & lex humana dirigere poterit civem, ut tamen non necessariò sit honesta moraliter: partim testimoniis Aristotelis, ut 5. Eth. c. 3. leges de omnibus præscribere ait, vel secundum virtutem, vel secundum alium aliquem modum: Et 3. Polit. c. 11. alias leges requirere bonas Respub: alias malas. c. 3. inter civem bonum & virum bonum distinguit. 2. Determinatè & quodammodò generaliter, ut ad iustum licitumque est determinata, notatque præceptum de honesto licitoque datum. Hoc significatum alij assumunt, negantque veram legem esse, quæ de illicito sit. Ita Plato l. 5. de legibus. Cicero l. 1. d. leg. §. 18. 19. 58. l. 2. §. 11. 12. 13. l. 2. d. inven: §. 36. Thomas 1. 2. q. 99. a. 2. q. 92. a. 1. q. 96. a. 4. Augustinus l. 1. d. lib. arb. c. 5.

*dicens: Mihi lex esse non videtur, quae iusta non est. Similia* l. 19. d. Civ. Dei. c. 20. *habet. Clemens Alexand. l. 1. Strom.* Valentinus T. 2. d. 7. q. 1. p. 1. Timpler. l. 4. Polit. c. 4. q. 7. D. Meisner. l. 1. de legib. q. 5. p. 74. & l. 4. f. 1. q. 8. n. 2. Piccolomin. gr. 10. c. 24. *Et consensit Aristoteles 5. Nicom. c. 1. Legalia iusta esse factiva dicens, & conservativa felicitatis. Et c. 5. Lex jubet secundum quamvis virtutem vivere, & prohibet secundum quodvis vitium vivere. Hac significatio huic loco est accommodatior. Et si vocabulum legis adeo ample interdum sumatur, ut quodvis sancitum notes, si-  
ve de objecto honesto, s. de inhonesto latum: In Ethicis tamen & Politicis non nisi de honestis licitisq. legibus docetur, & leges illicitae leges aquivocae dicuntur, ut statua lapidea dicitur homo, ut Piccolom. c. 1. loquitur: nec tam leges, quam legum enormitates & perversitates, ut Thomas c. 1. q. 92. non regulae actionum, sed anomaliae: non ordines, sed inordinationes, ut D. Meisner. c. 1. Imperata de iuribus esse possunt: leges tantum de honestis. Unde in hac materia lex pressius sumitur pro sancito honesto & licito. Iam n. in moralibus & Ethicis occupamur, & leges ex iustitia velut fonte derivamus ex th. II. Sed nec ex iustitia leges iniustae aut illicitae fluere possunt: nec Ethica & morum disciplina aliquid iniusti aut illiciti praescribere potest, & consequenter, quae in illa de legibus discipiuntur, ad leges honestas & licitas, non ultra, sunt extendenda. Interim vocis generalitati dari potest, ut lex generaliter pro omni sancito sumatur, si-ve de honesto illud sit, si-ve de illicito, ut & de voce juris th. 10. notatum.*

13. *Realia legis pertractando videnda in lege erit definitio, causa, divisiones, objecta, subjecta, affectiones, & opposita.*

14. *Definitio legis, prout in Ethicis tractatur, haec sit:*  
Lex



Lex est decretum à potestate habente sufficienter promulgatum, dirigens substantiam intellectualem ad ritè vivendum, & obligans ad obœdiendum, ut salus status servetur.

15. Circa definitum nota 1. Definiri hic legem, ut in Ethicis spectanda est, & ex justitiâ originem ducit, non prout ab honesto aut inhonesto abstrahit. V. c. 12. 2. Definiri hic legem non præcisè in se, sed ut est & in legislatore & subdito. Lex enim potest spectari, & ut est in legislatore: ita est actus legislatoris judicans, volens & imperans hoc aut illud à subditis servandum. Primus actus ad prudentiam ejus pertinet, secundus ad potestatem & auctoritatem. Non n. potest legitime velle & imperare aliis, nisi potestatem id volendi & imperandi habeat: sicut est in subdito: ita est judicium practicum intellectus, hoc aut illud promulgatum legitime servandum esse dictans: & ut est absolute in se, ita est regula vel mensura dirigens & obligans nos in nostris actionibus. Dirigit autem hoc modo lex, non per modum cognitionis seu judicii, sc. n. actus intellectus & judicium practicum dirigit: sed per modum objecti cogniti, sicut exemplar, quod artifex intuetur, dirigit ipsum in operando. Obligat, non effectivè obligationem in subdito causando, ita n. vel ipsa natura rei obligat, ubi lex est naturalis: vel voluntas superioris, ubi positiva: sed terminativè terminum obligationis inducendo, Est n. lex in se terminus, ad quem sequendum homo in suis actionibus obligatur: sicut objectum movet voluntatem, non effectivè malum in eâ producendo: sic seipsam movet: sed quia terminat eam, ut id, in quod voluntas per motum & operationem tendit. Hoc modo lex & ad intellectum pertinet, ratione directionis objectivæ: & ad voluntatem, ratione motus & obligationis, obligat n. voluntatem ad obediendum & exequendum imperata.

16. Ex genere lex dicitur decretum. Circa hoc adverte duo. 1. Genus rigidum legis dari non potest, quale in rebus directe predicamentalibus est; sed analogicum, prout in ente complexo genus esse potest. Lex enim complexum & collectivum quid est ex terminis pluribus in propositionem aggregatis: Vt, Deus est colendus, Parentes sunt honorandi: Non furtum, non adulterium est committendum. Legem connotatam & naturam quidam excipiunt, quam simplicem qualitatem & habitum dicunt, de quo alibi. Nec hoc magnopere videtur necessarium. Habitus legis potest esse simplex, ut ipsa lex sit aggregata. Sicut habitus principiorum theoreticorum & practitorum potest esse simplex, ut ipsa principia sint complexa & integra enuntiationes. Sed quae complexa sunt, directe uni predicamento assignari non possunt, & sic nec rigidum genus habere. 2. Vox decreti hic non sumenda specialiter, ut sententiam dubitantem, disceptantem, colligentem, succedentem, ignotum ex noto deducentem notat, sic multiplex imperfectio in decreto est, & Deo non competit, in quo decreta agnoscimus: sed generaliter, ut simpliciter sententiam latam & praeceptum resfaciende notat. Connotatur & illa voce & actus intellectus in legislatore, quæ prudenter regula moralis proponitur: & voluntatis, quæ ejus imperio ad regulæ observationem subditus obligatur, nempe: Volo & jubeo, hanc regulam subditus observari. Jubere enim lex debet, non disputare, ut Seneca ep. 94. loquitur. Per hoc differi à consilijs, admonitionibus, dehortationibus, suasionibus, dissuasionibus, quæ monere & dirigere possunt, imperare & obligare non possunt. Vnde Hieronymus l. i. con. Jovin. Vbi consilium datur, offerentis arbitrium est: ubi praeceptum, necessitas serviensis. Varia aliàs genera legis assignantur à variis. Quidam per imperandi prohibendique sapientiam, alij per rectam rationem



rationem summi Iovis, alii per rationis ordinationem, alii per  
 communem civitatis consensum, alii per doctrinam, vel con-  
 stitutionem, vel normam, vel dictamen rationis practica, vel  
 divina voluntatis patefactionem, alii per aliud genus defini-  
 unt. De quibus Hornejum l. 4. Eth. c. 3. n. 11. 12. D. Meif-  
 ner. l. 1. d. leg. q. 2. aliosq. videas. Omnia inaccuratè. Quæ-  
 dam magis causam legum efficientem, quàm genus dicunt, ut  
 communis civitatis consensus. Quædam effectum magis &  
 affectionem, ut ordinatio: lex n. non ordo, sed ordinis norma  
 est: Quædam nimis laxa sunt, & consiliis etiam competunt, ut  
 rationis ordinatio, doctrina: Quædam nimis stricta, & le-  
 gibus divinis tantum competunt, ut divina voluntatis patefa-  
 ctio: Quædam tropica & metaphorica, ut ratio summi Iovis:  
 ut uberius per discursum dici poterit. Dices: Nec decretum sa-  
 tis exhaurit naturam legis, nam lex nature non est decretum,  
 sed habitus quidam connatus, & notitia naturalis, & tamen  
 lex. Est potius norma agendorum, quàm decretum. R. Vt lex  
 nature dicitur lex, sed indita & innata nature intellectu-  
 ali: Ita & decretum & dictamen rationis naturalis est natura ra-  
 tionalis naturâ inditum, i. e. sententia & principium luminis  
 naturalis dictans, quæ agenda, quæ omittenda sint. Vt decre-  
 tum externâ præscriptione & promulgatione jubet agenda  
 & omittenda: Sic lex nature internâ dictatione & inscri-  
 ptione menti humane inditâ. Quæ promulgationi analogon  
 quid est. Vt in promulgatione aliquid indicatur externè: Ita  
 in naturali impressione internè: quod suo tempore, ubi orga-  
 na cognoscendi justè conformata fuerint, in actualem cogni-  
 tionem erumpet, ut in infantibus videmus. Et ut lex est norma  
 & mensura, si absolutè & præcisè sumatur, v. c. 15. Ita respectu  
 legislatoris est decretum: respectu subditi, cui fertur, obligatio.  
 Et ita in definitione definitur, ut clariùs natura ejus patefcat.

17. *Cetera verba differentiae loco sumuntur. Ea & à causis, & subjectis, & officio legis proprio sumuntur. Ab efficiente dicitur, à potestatem habente sufficienter promulgatum. Lex à superiore fertur, qui habet potestatem, & jurisdictionis: ut imperare queat legem, qua subditos dirigere & obligare in actionibus debet: Nemo a. obligabit alios, nisi qui habeat jurisdictionem in illos: & coactionis, ut cogere ad obædientiam aut pœnam sustinendam possit. Vnde gladius Magistratui à Deo datus, Rom. 13. v. 4. Ut efficaciter exequi possit leges suas in subditis: secus lex sine executione est campana sine pistillo. Talem jurisdictionem habet vel ipsa communitas, qua jus legislatorium, ut corpus liberum, sibi reservare potest: vel communitatis præses, i. g. vel supremus, ut DEVS, qui ut absolutus omnium Dominus omni intelligenti creatura legem ferre potest, cui absolute obædire coguntur: vel subordinatus & respectivus, ut homo superior auctoritatem ferendi leges vel immediate à Deo habens, ut Moses in V. T. Exod. 21. v. 1. vel mediatè à communitate accipiens, qua incertam personam hoc jus transfert, etq. exequendum committit. Ut in Rebusp. esse solet. Dicitur porro, sufficienter promulgatum. Hoc necessarium requisitum in lege est, sufficienti intimatione subditis factâ promulgari, i. e. patefieri & indicari. Dicitur enim promulgari quasi provulgari. Nam sine hoc lex nec dirigere nec obligare potest, nec rationem præcepti subditis facti sufficienter obtinere. Lex n. ex formali officio debet dirigere & obligare, ut post dicitur. Sed dirigere nihil potest, nisi præscribatur & promulgetur. Vnde quàm diu lex in legislatore manet, non proponitur subditis, non habet totale completivum requisitum, ad completam legis rationem necessarium, nec officium legale exercere potest. Sic lex æterna in Deo, quâ æterna, nondum habuit accuratam rationem legis,*



legis, antequam subditi essent, quibus proponeretur cum obligatione. sic in Repub. cum lex in mente legislatoris adhuc teneretur, completam legis rationem non habet, nisi ubi subditiis est promulgata.

18. Depromulgatione nota I. Promulgatio hic non sumenda strictè, ut externam & solennem tantum notat, quomodo ap. Romanos legem promulgare erat integro trinundino seu 27. diebus publicè proponere: sed latè, ut quamvis sufficientem voluntatis patefactionem subdito factam notet, s. ea sit interna & analogica, qualis est in lege natura mentibus hominum à Deo insitâ. V. r. 16. s. externa & magis propria, quæ externo aliquo signo fit, Voce vel scripto. Voce apud Lacædæmones proponebantur, ubi Lycurgus vetuit leges scripto servari, ut melius servarentur animo. Plut. in Lyc. Scripto apud Athenienses & Romanos. 2. Signum externum promulgationis sufficiens sit ad notificandam voluntatem Legislatoris, partim ratione modi notificandi, ut ille satis sit clarus, apertus, patens: secus non satis illam cognoscerent subditi. Vnde malè Caligula leges minutissimis litteris angustissimoq. loco proponebat, ne quis describere posset. Sueton. in Calig. §. II. partim ratione objecti, Cui notificatur, ut satis universaliter notificetur, saltem ipsi communitati, cui lex obliganda fertur: ut potissima ejus membra illam sciant, & ab illis singulis innotescere possit: non a. præcisè omnibus communitatis individuis singulariter sumptis, hoc enim non necessarium est, cum manifestata potiorib: membris lex, ad notitiam cæterorum sufficienter pervenire possit, nisi ex supinâ & crassâ ignorantia præterire eam velint, qua nec in foro conscientie, nec in seculari excusationem inveniet. 3. Promulgatio est vel solennis, quæ cum debito ritu & ceremoniâ fit, quomodo Deus legem moralem proponebat, Exod. 20. Hæc in lege humanâ est neces-

*cessaria, quia Magistratus prater personam privatam, quâ ut civis Dei & natura spectatur, & subditis par est, etiam personam publicam sustinet, & per hoc superior est subditis. Ut ergo constet, quod ex publicâ auctoritate, quâ pollet, velit obligare subditos, oportet publicâ & solenni ceremoniâ id testetur. Ita Romani solennitates adhibebant, de quibus Pontanum l. 4. progym: dial. 20. Demsterum l. 8. antiq. Rom. c. 2. videas. In lege divinâ non est semper necessaria. Quia Deus sine ceremoniâ potest efficere, ut certò constet, divinâ auctoritate se velle nos obligare. Est n. absolutus omnium dominus: Vel non solennis, cum sine ceremoniâ lex notificatur. Sic Christus iussit Apostolos predicare Indæ. Matt. 10. v. 5. 4. Promulgationem debet sequi legis acceptatio: vis n. obligatoria legis pendet ab acceptance ejus à Repub. pro jure, quod sibi in eâ re reservavit. Et princeps potestatem condendi legem habet in tantum, in quantum communitas concessit: quod fecit cum reservatione acceptandi vel non acceptandi: unde si populus non acceptet legem, obligare lex non potest. Acceptatio a. ad minimum à majore communitatis parte fieri debet, etsi non ab omnibus Individuis fiat. Acceptatur autem vel consensu tacito, cum non expressè rejicitur: vel expressè per scriptum aut vocem, cum scripto aut voce lex placere indicatur: vel praxi & ipsâ executione, cum major communitatis pars de facto legem exercere incipit, & ad ejus præscriptum actus suos dirigere.*

19. Ab officio & subjecto dicitur porro, dirigens substantiam intellectualem in vivendo, & obligans ad obœdiendum. Officium legis est directivum & obligativum. Directivum, quia dirigit actus nostros per modum exemplaris & objecti cogniti. v. t. 15. Lex divina actus & externos & in-

con-



concupiscentiam prohibet, V. Matt. 5. v. 28. humana externos  
 primario, internos secundario. Vnde nemo in foro soli luit, qui  
 interne tantum peccavit. Dirigit a. lex partim actu, & in  
 hoc est officium legis: partim potestate, h. e. vi dirigendi instru-  
 eta est, & in hoc ipsa essentia legis consistit. Potest n. actualis  
 directio abesse à lege, ut qui legi obligatur, & ignorat eam,  
 non dirigitur à lege, V. z. 18. Obligativum, quia infert debi-  
 tum morale in subdito, quo conformare tenetur suam volunta-  
 tem ad voluntatem legislatoris sub comminatione poenali, si  
 contrà faciat. Conformatio a. fieri debet non solum ratio-  
 ne objecti vel rei volitæ, sic n. aliquid voli potest, quod &  
 superior vult, ut tamen voluntati superioris non sufficienter  
 conformetur, si non talibus circumstantiis velit, quibus su-  
 perior vult. Sic David volebat templum extrui, quod & Deus  
 volebat, sed à Davide id fieri nolebat. I. Chron: 23. v. 8. 9. sed  
 & modi volendi, ut præcisè subditus ita aliquid velit, quo-  
 modo ipsum obligatum esse superior voluit. Ita conformatio  
 spectanda & ratione temporis, quando, & quamdiu aliqua  
 lex obligat: ubi lex vel ex nunc, ut loquuntur, & à promulga-  
 tione statim obligat, vel post aliquod intervallum: vel perpe-  
 tuò & incessanter, vel ad certum tempus, ut leges ceremonia-  
 les V. T. Et ratione modi, quo lex obligat: & poenaliter, si pec-  
 ces, Ita omnes leges ferè poenas transgressoribus assignant: in-  
 terdum & sub periculo vitæ, cum observatio legis plus com-  
 modi publico bono infert, quàm conservatio vite privata: aut  
 violatio plus nocet bono publico, quàm amissio vite propriae.  
 Ut si cum detrimento vera fidei, totius Reipubl. Magistratus  
 contumeliâ & similibus sit conjuncta. Ita Imperator in neces-  
 sitate militem obligare potest ad stationem non deferendam, et-  
 iam si ibi moriendum sit: & conscientiosè, ut à proprio inter-  
 no mentis dictamine homo ad observandam legem obstringa-

tur, aut Deum offendat. Hoc & directè & immediatè fieri potest, quomodo omnis lex divina obligat : & indirectè & mediatè, quatenus consequenter Deus laeditur per inobedientiam vicario suo prestitam, quomodo leges humanas conscientiam obligare statuunt. V. Rom. 13. v. 2. 5. 1. Pet. 2. v. 13. 19. D. Meissner. p. 3. Ph. so 1. 2. c. 4. q. 12. Et ratione objecti, quomodo lex vel generaliter omnes homines ratione utentes obligat, ut nullus excipiat, ut lex moralis : vel specialiter unius Reip. membra, quibus fertur : sic lex ceremonialis & forensis Iudeos ; Romana Romanos : Vel scientes & ignorantes simul, postquam est promulgata, Vt lex nature, de qua D. Meissn. p. 3. P. S. f. 2. c. 4. q. 3. videatur : vel solos scientes, ut lex humana & civilis, si id intendat. Vnde Cod. d. leg. t. 14. §. 9. leges, quæ hominum constringant vitas, ab hominibus intelligi debere Imperator ait.

20. Ex subiecto dicitur, dirigens substantiam intellectualem. Lex activè & passivè sumpta subiectum agnoscit substantiam intellectualem, intellectu & voluntate præditā, ut Deum, angelos, homines. In Deo est lex activè, quia legem sancit : In angelis & hominib. & activè & passivè, quia & legem ferunt, & latam accipiunt. Brutum & inanimatum legem accipere non potest, quia intelligere præscriptum non potest. Junguntur interdum in legibus bruta hominibus, ut Exod. 21. v. 28. Levit. 20. v. 15. 16. Sed ut materia & objectum legis, non ut subiectum recipiens. Homini propriè ut subiecto lex fertur, V. Exod. 21. v. 1. Lev. 20. v. 22. nam is, quod lege præceptum est, exequi debet. Exod. c. l. v. 29. 32. Sed brutum potest esse materia & objectum legis, circa quod homo, ut subiectum, ex obligatione legis agere debet. Et supplicium ac vindicta de brutis sumitur, Vt Gen. 9. v. 5. Levi. 20. v. 15. Sed in exaggerationem & detestationem facti, non quasi propriè



contra legem latam deliquissent. Sic supellex Achanis combusta, Jos. 7. v. 25. in detestationem peccati Achanis, non quasi ipsa peccasset. Sic in detestationem Sodoma etiam brutum occiditur, Lev. 20. v. 15. Jericho, Sodoma, Gomorrha excise, in detestationem scelerum ab incolis patratorem, non quod aedificia peccarint. Casus & argumentum legis de bruto esse potest: Lex ipsa fertur pro homine. Loquimur a. de lege positivâ. Lex naturalis etiam bruto est indita, v. t. 22. Sed de illâ hic non est questio. Positiva non nisi intellectuali creatura ferri potest. Sic in Jure Civili, si quadrupes pauperiem fecerit, actio datur, sed in herum, cui lex est data. V. Hunnium T. I. in Treutler: d. 19. q. 4. & patet l. 1. §. 12. digest. Si quadrupes. Idemq; in Jure divino servatur. Exod. 21. v. 29. 35. 36.

21. *Ultimò in definitione dicitur, Vt salus status ferretur. Hoc à fine legis sumptum. Finis legis vel est ultimus, idq; vel absolutè, Vt gloria Dei: vel determinatè, ut salus status cujusq; & publici, ut bonum communitatis & Reipublicæ, & privati, ut status Oeconomici, domestici: Vel intermedius, qui & magistratus directio est, ut sciat, quid exequi & custodire debeat: & subditi, ut sciat, quid agere aut vitare conveniat.*

22. *Ita definitio legis explicata fuit. Causa efficiens & finalis ex th. 17. 20. materialis ex t. 12. patet, quod sit omnne licitum. Objecta & subiecta legis ex t. 19. 20. patent. Hic illud nota, objectū legis debere esse rem præsentem & futuram, non præteritā, V. lib. 1. Cod. tit. 14. §. 7. In humanâ etiam possibile, & publicè privatim utile. Ad impossibilia enim non est obligatio. Vnde inepta Mexicanorum lex fuit, quâ juramento Regem suum obstrinxerunt, ut serenitatem & pluviam suo tempore suppeditaret, grandines, imbres & si quæ noxas averteret, notante Arumæ Vol. 3. dis. Acad. d. 23. t. 46. Cum nihil horum in potestate habuerit. Et de privatis*

rebus *leges publicè dare eludere homines est, non obligare. Sic Claudius inter edicta retulit, largo vini proventu benè picanda esse dolia: & vipera morsum nullo validius curari, quàm taxi arboris succo.* Sueton. in Claud. §. 16. Divisiones legis *variae sunt. Ex speciebus dividitur in naturalem, divinam, & civilem. Naturalis, quam DEVS impressit naturæ. Hæc vel homini cum brutis communis est, ut defendere seipsum, fatum amare & alere: Vel soli homini propriæ, Ut Deum timere, parentes honorare. Huc pertinet & jus gentium, quod natura hominē docet, ut est animal sociale. Dicitur etiam jus naturæ ortum. Theologi & Iuri in definiendo hic diverunt, quod Vide ap: Becanum p. 2. T. 1. Th. Sch: tr. 3. c. 3. q. 1. Amesium l. 5. Cas. confc. c. 1. q. 3. Divina est, quæ peculiariter à Deo statuta est. De eâ postea. Civilis, quam homines ut animalia socialia pro communitatis utilitate, necessitate, & circumstantiis constituunt. Subdividi solet in scriptam & non scriptam, quæ & jus consuetudinarium dicitur: principalem & secundariam, quæ edicta prætorum, responsa prudentum & similia complectitur. De his divisionibus V. Dempsterum l. 8. ant. Rom. c. 1. Ex subjectis legem ferentibus dividitur lex in divinam & humanam. Divina, quæ DEVM authorem habet: & in moralem, forensem ac ceremonialem subdividitur, de quon uberiùs Theologi videndi. Humana, quæ homines authores habet. Subdividitur ut civilis supra. Ex modo ferendi lex in publicam & privatam dividi potest. Publica, quæ publico nomine pro bono publico fertur. Ut Politica. Privata, quæ privato nomine pro bono privato fertur. Ut lex domestica, Oeconomica, &c.*

23. Ita divisiones legis: Sequantur affectiones. Eæ sunt necessitas, dignitas & utilitas legum in Repub: de quâ Platonem l. 4. d. leg. Aristotelem §. Politicor. c. 8. Dempster-



psterum præf. l. 8. ant. Rom: *aliosq; vide.* Bonitas, quâ lex  
 non illicita, sed licita objecta præcipere debet. V. t. 12. Efficacia  
 legis, quâ per officium legale & vi ostensivâ, & obligati-  
 vâ, & coercitivâ prædita est, V. t. 19. & inobedientibus pæ-  
 nas minatur vel generaliter, vel specialiter, modum & ratio-  
 nem pænæ assignando. Sic lex naturæ furtum in genere puni-  
 endum dicitur: positiva vel capitæ pænâ, vel relegationem,  
 vel restitutionem in specie assignat. De hoc quedam ap. Be-  
 canum c. l. c. 7. vide. Respectu materiæ, circa quam versa-  
 tur, etiam vi inhabilitandi personas, rescindendi contractus  
 & juramenta, æstimandi res & pretia assignandi, privilegia  
 tollendi & revocandi est prædita. Quæ persequentem eundem  
 c. l. c. 6. q. 9. 10. vide. Interpretatio, quæ est commoda le-  
 gis scriptæ explicatio, & ad casus speciales applicatio. Estq; vel  
 simplex, cum tantum mens legis explicatur in casu particula-  
 ri, quam reverâ habet: Vel per æquitatem & correctivâ,  
 cum mens legislatoris explicatur, quam habuisset in casu parti-  
 culari, si illum dijudicasset. Dicitur & æquitas, et iusticia, cum  
 juris litteram servare nimis injurium videtur. Differt à lege  
 non toto genere, sed ut moderamen, exceptio & appendix legis,  
 ad sensum benè applicandum conducens. Præstantius quid ipsâ  
 lege dicitur Aristoteli 5. Nicom. c. 14. quâ emendativum  
 præstantius est eo, quod emendatur: & ex non emendato peri-  
 culum metuendum est. Oportet enim, si quid obscurius in legi-  
 bus est, interpretatione nostrâ patefieri, duritiâque le-  
 gum nostræ humanitati incongruam emendari, ut Impe-  
 rator loquitur l. i. Codic. t. 14. §. 9. Interpretatio hæc vel est  
 restrictiva vel extensiva. Restrictiva, cum verba legis plus  
 inferre videntur, quam legislator voluit. Sic lex de Sabbatho  
 sanctificando absolutè posita videtur. Restringendâ tamen est,  
 ut casus summæ necessitatis excipiat, ut liceat se Sabbatho

contra hostes invasores defendere, ut Maccabæi, 1. Macc. 2. v. 41. aut hominem egrotum sanare, ut Christus. Matt: 12. aut panes sacerdotibus tantum debitos in fame comedere, ut David, à Christo excusatus. Matt: 12. Sed in his casibus magis simplex est interpretatio, quam correctio. Hæc enim in lege humanâ locum habet, non divinâ. Sic lex generalis videtur, Matt. 5. Ne resistatis malo: Explicandam tamen & restringendam apparet ad leviores injurias, ut alapam sufferendam, iter occupandum, pallium deferendum. v. 39. 40. Et ultionem privatam, ad quam Pharisei legem Exod. 21. v. 24. extenderant. Sic generale est: Deposited est reddendum repositenti. Ex æquitate tamen restringendum, ne furioso arma repositenti reddantur, ne alios lædat, & salutem publicam turbet. Extensiva, cum verba legis minus inferre videntur, quam legislator intendit. Sic si verba legis de certo casu disponant, ratio autem appposita sit generalis, apparet, legem ad omnes similes casus extendendam esse. Sic non licet uxori, liberis, servis, sine consensu patris, & heri votum facere, quia non sunt sui juris, sed alieni. Num. 30. v. 4. 5. 6. Hic rectè extensio ad similem casum addit, Et nec juramentum præstare, nec matrimonium inire tunc tali consensu posse colliguntur. Sic Levit. 18. v. 14. prohibetur concubitus cum uxore patrui, quia sit propinqua carnis: Ex istâ ratione ad similem casum colligitur, nec cum uxore avunculi concumbendum, quia pari gradu adgnatissima materna distat hac, quo in paternâ illa. Interdum extensio illa legis ex partibus antecedentibus aut consequentibus, interdum ex aliâ lege priore cum hac collatâ, interdum ex casu opposito, interdum ex consequente prohibito ad antecedens prohibitum colligendâ, est colligenda. Oppositum hujus interpretationis est antiquæ doctrinæ, summum jus, de quo dicitur scriptum: summum jus summa injuria. Illud præcipit magis scriptum.

*Summitatem pro rigiditate sumendo, non excellentiâ aut dignitate: quando nimis rigide littera legis observatur, & in ap-  
piscando potius injuria, quàm justitia committitur: Et hyco-  
phantia seu illusio, quâ calidè sensus legis eluditur, & in alie-  
num, extendendo vel restringendo, illicitè detorquetur.*

24. *Ita affectiones legum vise: Videnda sunt ejus co-  
gnata & opposita. Cognatum legis est censura, sedula mo-  
rum animadversio, corrigens ea, quæ nondum scriptâ lege sunt  
comprehensa, aut judicio publico subjecta. Eam diligentissimè  
exercuerunt Romani, & prudentissimis justissimisque hominibus  
exercendam delegarunt. De eâ plura K  ningus d. 10. Pol.  
Amiratus l. 11. diff. Pol. dif. 2. Bodinus l. 6. d. Rep. c. 1.  
Lipsius de Vet. mag. Rom. c. 18. Dempsterus l. 7. ant.  
Rom. c. 10. alijq   habent. Opposita legum sunt primaria &  
secundaria. Primaria, illegalitas & legum abrogatio. Secun-  
daria suspensio & dispensatio. Illegalitas est universalium le-  
gum contemptus, & vitæ ad proprium arbitrium exactio. Affi-  
nis est injustitia Universalis, de qua r. 27. agitur. Abrogatio  
est efficacie obligatoria in lege sublatio. Est q   vel partialis,  
cum pars legis abrogatur, pars servatur, dicitur etiam deroga-  
tio: vel totalis, cum universa lex in obligatione tollitur, &  
nihil servatur. Dicitur simpliciter abrogatio. Hac vel licita  
est, cum causa abrogandi est sufficiens & rationabilis. Vt cum  
coelibatus prohibetur, si Respub. viris per bellum sit exhausta:  
Vbi illis instructa iterum est, tollitur prohibitio: Vel illicita,  
cum causa abrogandi est irrationabilis. Vt cum impij legem  
moralem abrogatam cupiunt, ut suo tantum arbitrio vivere  
liceat: Cum luxuriosi leges vestiarias & sumptuarias abroga-  
tas cupiunt, ut ad suam luxuriam vitam agere liceat. Su-  
spensio est obligationis legalis ad tempus inhibitiio, ut in futu-  
rum iterum valeat. Sic cum prohibetur vallum scandere, sed*

*rem-*



tempore belli publici illa lex suspenditur, nec vigere debere, nisi patrato bello, asseritur. Dispensatio est obligationis legalis in particulari relaxatio, in casu tali, ratione cuius obligatio aliàs locum habet. Hac in lege positivâ & humanâ locum habet à superiori, nam ejus est relaxare, cuius est ligare: in lege morali & naturali propriè à nullo, nec homine, nec DEO, dispensari potest. Non homine, quia nō est superior lege morali, sed inferior: Non DEO, nā decreta divina sunt immutabilia, Deus n. est immutabilis & essendo, & agendo, & decernendo, ut alibi probavi, dec. 1. d. 6. Lex autem naturalis & moralis est decretum divinum, eterna & immutabilis veritatis. Et approbaret aliàs Deus aliquid intrinsecè malum ac turpe, nam quod contra jus morale & naturæ, formaliter malum ac turpe est, nec fieri potest bonum, quamdiu circumstantia manent, sub quibus est malum. Sed hac contra justitiam, bonitatem, & sanctitatem Dei est. Impropriè Deus dispensare hic potest, i. e. excipere aliquid à lege, ut in tali casu lex obligare non debeat, & materiam quandam ac circumstantiam tollere, sub quâ lex aliàs obligabat. Sic jubebat Abrahamum filium suum interficere, & fratrem in casu carentia heredum fratrem suam in uxorem ducere, quæ aliàs illicitæ erant, nisi sub hac circumstantiâ essent, ut in tali casu, autoritate Dei interveniente, legem obligare non debere intelligeretur. V. d. 2. t. 14. Sic potest vox à regulâ excipi, non quod sub regulâ contineatur, & dispensatione ab valore regulæ absolvatur: sed quod per illam exceptionē ad regulam non pertinere, verum ab illâ immunem esse intelligatur. Plura de dispensatione ap. Thomam 1. sec. q. 100. a. 8. Valentiam T. 2. d. 7. q. 4. p. 6. & q. 5. p. 9. Becanum c. 1. c. 6. q. 13. Molinam. d. just. & jure to. 6. tr. 3. d. 57. Lessium l. 2. d. just. & jure c. 40. n. 112. seq. D. Meisnerum l. 3. d. leg. q. 10. & p. 3. Ph. Job. f. 2. c.

4. q. 11. D. Brochmand, L. C. d. leg. c. 4. q. 6. Covar-  
ruviana T. 1. Var. res. par. 2. d. matrim. §. 9. aliosq. legas.

25. Sic effectum *justitiæ universalis*, *jus* & *lex tracta-*  
*tum*, quantum ad *Ethicam disciplinam* pertineat. *Specialiora*  
*ad Politicam, Theologiam, & Jurisprudentiã* pertinent. Et ha-  
tenus etiam absolute in se *Justitia Universalis tractata*: Re-  
stat tractanda respectivè, ratione diversitatis & oppositionis.  
Diversitas est, quã distinctio ejus à *Virtute morali* in genere,  
à *prudentiã*, à *justitiã particulari*, à *virtutibus homileticis*, à  
*pietate in patriam assignatur*, quomodo ab istis omnibus distin-  
guatur. A *virtute morali* in genere differt ratione & for-  
malitate, non totã essentia realitate. *Virtus* ex se principaliter  
perfectionem proprii subjecti respicit: consequenter tamen &  
ad bonum publicum tendit, ut & boni communis gratiã munus  
cujusq. virtutis explicetur. Quod patet & ex naturã hominis,  
qui, quã talis, sociale animal est, & tunc vere felicem se censet,  
cum in commodã societate vivit: & ex naturã quarundã vir-  
tutum, quæ principaliter pro communi bono servando exercen-  
tur, ut fortitudo bellica, magnanimitas, magnificencia: & ex  
naturã virtutum homileticarum, quæ primario societatem &  
conversationem humanam respiciunt, intra quam exerceri ab  
virtuoso debent: Et ex eo, quod qui honestatis gratiã virtutes  
exercet, per se & ex suã naturã non possit vel leges de virtuti-  
bus latas contemnere, quas ipse agnoscit salutare, ut qui res il-  
lis præceptis observat: vel Magistratum odisse, verum legum  
custodem & executorem. Quicquid per accidens contingat,  
Ut cum quis per ambitionem aut privatam similitatem magi-  
stratum contemnit: Inde non sequitur, quod leges, quas ipse  
salutares judicat, & quarum præcepta servat, abrogatas cupe-  
re possit. Iam *justitia Universalis* principaliter ad bonum  
commune tendit: secundario ad propriam cujusq. perfectionem.

Ita & virtutis moralis & iustitia universalis una quæ rem est  
 essentia, intentione primariâ & secundariâ differunt. Sed quæ  
 intentionibus saltem differunt, cætera in formis & essentijs  
 conveniunt, totâ specie & essentia realitate differre non pos-  
 sunt. Universa virtus consideratur sub honestate & perfectio-  
 ne subjecti proprii: Universa iustitia sub honestatis ab publi-  
 cum usum fructumq; applicatione & iustâ exercitatione. Uni-  
 versa virtus est velut ἀρετή, ἡδὺς & ἀπλὸς in suo subjecto  
 perfectivè se habens: Universa iustitia velut ἀρετή, ἀπλὸς  
 ἡδὺς, & ἀπλὸς ἐπὶ τοῦ perfectivè se habens: Ut non solum pro-  
 prium subjectum perficiatur, sed & erga alia per omnes vir-  
 tutes decorè quis competenterq; se gerat. Virtus est habitus  
 nudus & absolutus: iustitia est habitus in iustissimo usu ad alios  
 exercitius. Illa honestum facit: hæc etiam præclare se cum alijs  
 gerentem facit, cum virtutem foras progredi facit: nec tan-  
 tùm possessorem honestum reddit, sed & fructum insignem à  
 virtute ad totam Reipub. redundare facit. Nuda virtus bo-  
 num pro se facit: iustitia Universalis, ut etiam bonitate suâ  
 alijs & Reipublice quis prosit. Id apertè ex ejus opposito, inju-  
 stitiâ Universalis patet, quæ est universalis omnium legum &  
 virtutum erga alium violatio, & injuriarum quarumvis illa-  
 tio. Et potest discrimen inter Virtutem & iustitiam exemplo  
 legis & præcepti illustrari. Ut lex & præceptum quæ rem idem  
 sunt, Cum utrumq; virtutis præceptum pro essentiâ habeat: ra-  
 tione distinguuntur, quòd lex dicatur, quâ homo in totâ com-  
 munitate, ut membrum stringitur: præceptũ, quâ tanquam  
 privatus & sibi solitariè vivens coercetur: Ita iustitia &  
 virtus universalis reipsâ conveniunt: Vtrâq; est habitus moralis  
 ad honesta per servandam mediocritatem inclinans: Ratione  
 differunt, quòd hæc ad honestum inclinet etiam in statu priva-  
 to, & possessorem tantùm bect: illa in statu sociali & ordine  
 ad



ad leges & Rempubl: nec possessorem tantum perficiat, sed & illos, quibuscum illi conversandum in publicâ societate est. Et ita expresse Aristot. 5. Nicom. c. 3. Virtutem & justitiam universalem unum idemq; esse docet: in eo tantum differre, quod virtus per se sit, justitia ad alterum collativè. Quàm Aristot: mentem esse concedunt Lessius l. 2. d. just. c. 1. n. 15. & Strevesdorf. d. just. & jur. q. 57. Bachovius in l. 1. inst. t. 1. n. 1. Essentiam justitiæ quidam diversam à virtute morali esse ait Aristoteles: sed per tò *ύπαρ* interdum rationis esse & formalem conceptum notat, non semper discrimen essentielle, ut exemplis ostendit Hornejus l. 3. Eth. c. II. n. 3. *Vi frustra sit* Timplerus l. 3. Eth. c. 10. q. 4. contradictionem in appposito inde implicari metuens. Oppositum sentiunt alij, & just: univ: diversam virtutis speciem faciunt, etsi vi, officio, & efficacità generalis esse queat. Quomodo caritas virtus generalis dicatur, quod omnes virtutes ad finem suum ordinet, ut inserim diversa virtutis species ab alijs dicatur. *Vi* Thomas, Molina, Soto, ap. Hornejum 3. Eth. c. II. n. 3. Valentia T. 3. d. 5. qu. 2. p. 2. Lessius c. l. n. 11. Strevesdorf c. l. & art. 6. & apud illum Bannet, Arragon, Salon, Malderus, Sylvius, alijq;. De quorum argumentis Hornejum c. l. videas, & per discursum videri poterit.

26. A prudentiâ differt, quod prudentia virtutem absolute & in se dirigat, justitia respectivè & in ordine ad aliū: prudentia mediocritatem dirigat, justitia usurpationem & exercitationem virtutis: prudentia honestum ut honestum respiciat, justitia honestū, ut justè & aequè erga alterum exercendum: Prudentia virtuosum faciat, justitia virtuosè erga alium se gerentem. Prudentia virtutem in accommodatione mediocritatis pro circumstantijs loci, temporis, personarum, dirigat: Justitia virtutem ad obædientiam legum & justam erga alios

*exercitationem pro salute publicâ ordinet. A justitiâ particulari differt, tanquam totum à parte, & latius ab angustiori. 1. Objecto. Illa versatur circa objectum speciale, bona externa, ut in illis suum cuiq; attribuitur: hac circa commune & aggregatum omnium virtutum, ut in omni honesto decorè justicquè nos erga alios geramus. 2. Appellationis diversâ attributione. Justitia particularis est propriè rigideq; dicta, quæ est inter ita distincta, quorum unum non est pars alterius, nec obligationem ad illud involuit. Inter hæc enim equalitas & exaquatio propriè & exquisitè dicta esse potest. Vnde negatur inter Creatorem & creaturam, patrem & filium, herum & servum, rigidam inveniri justitiam, quòd Creatura essentialitèr obligetur creatori, herus servo, filius parenti. Conf. 5. Nicomach. c. 6. Sed universalis est impropriè & per analogiam dicta: Nam privatus benè agens in ordine ad leges publicas est membrum communis publicæ, adeoq; illi obligatur: Vnde quod confertur in communitatem, etiam in civem conferri dici solet, ut partem communis. Perfecta autem equalitas justitiæ inter obligantem & obligatū esse nequit, ut quæ inter illos est, qui sibi invicè non sunt subiecti, adeoq; ex justitiâ pacisci inter se possunt. Per quod tamen nihil demitur de præstantiâ just: Vniu: quomodo nec pietatis, fidei, aut caritatis eminentie aliquid demitur, quòd virtutes analogicas illas vocemus. Eo ipso enim eminentius quid communi virtute morali esse indicantur. 3. Opposito. Illius oppositum est *παρανομία* s. rerum externarum inequalis distributio & commutatio: Hujus *παρανομία* seu totalis omnium legum & honestorū violatio. A virtutibus homileticis differt, quòd illæ particulares sint, & circa particularia objecta occupatæ, e. g. verba, gestus, actus: hæc generalis & circa omnium virtutum objectum indeterminate occupetur. Illa conversationem in primis pri-  
va-*

vatorum respiciunt: hac in primis societatem publicam & leges publicas. Illa hominem præcisè perfectum in & per se faciunt: hac circa alios in publicâ societate perfectè justeq; se gerentem. A pietate in patriam differt, quæ etiam virtutes singulas in bonum publicum ordinat. 1. Quia diversa est obligandi ratio in justitiâ vn: ac pietate in patriam. Justitia obligat hominem, ut partem ad totum, & membrum societatis ad integrum corpus: pietas ut effectum ad causam, ratione communis auxilij, quod patria ad ortum hominis contulit. Sed obligatio partis ad totum, membri ad corpus, est ætior rigidiorquè obligatione effectus ad causam, & in civilibus præfertur huic. Sic v. g. tenetur civis Rempubl. in defensione præferre patri ejusq; vitæ, quia illius pars & membrum est, hujus tantum effectus. Sic Christus maritum patrem & matrem reliquitur ait, & adhesurum uxori suæ. Matt. 19. v. 5. Quia familia suæ domestica pars est, parentum tantum effectus. At ubi diversa, major minorq; est obligatio in virtutibus, ibi ipsæ virtutes diversas esse nihil impedit. 2. Quia sub aliâ ratione boni publici salutem procurat pietas, quàm justitia Vniuersalis. Pietas sub eâ, quod æquum sit, juvare aut prodesse patriæ, Vbi primum cæli haustum imbibimus. Partem enim nostrum sibi vendicat patria, partem parentes, ut Cicero ait l. 1. offic. §. 22. & 2. d. finib. §. 45. Just. Uniu. sub illâ, quod æquum sit, legibus publicis de omni virtutum genere præcipientibus præstare obædientiam. Pietas legem etiam innatam, ut vocant, respicit: Justitia Vniuersalis magis positivæ in Repub: latas & receptas.

27. Fuit diversitas Just: Vniuersalis: sequitur Oppositio, quâ contraria ejus inquiruntur. Contrarium ejus est injustitia Vniuersalis, seu paronomia omnium legum honestarum, & virtutum promiscuè violatio, quantum simul in uno



Subjecto esse potest. Quaedam n. vitia sunt destruētis natu-  
 ræ, & unum evertit alterum, ita simul in uno subjecto esse non  
 possunt. Virtutes a. sunt perficientis naturæ, & una alie-  
 ram non perimit, sed perficit, ita & in uno subjecto omnes in  
 universum esse possunt. Sic potest homo & prudens, & justus,  
 & fortis, & temperans, liberalis, urbanus, modestus, concors,  
 verax, humanus, mansuetus &c. simul esse. Sed nequit aliquis  
 simul esse audax & timidus, insensatus & intemperans, ni-  
 mis rigidus & laxus, avarus & prodigus, parcus & profusus,  
 superbus & dejectus, superstitiosus & atheus, crudelis & len-  
 tus, &c. quia funesta est vitiorum familia, & unum alteri est  
 exitium. De effectu tamen & appetitu omnia vitia in uno  
 subjecto universaliter injusto esse possunt, etsi de facto & actu  
 esse non possint. Potest, qui de facto est audax, prodigus, super-  
 bus, crudelis, etiam affectum habere, ut si fieri posset, vellet si-  
 mul esse avarus, dejectus, lenis: ita affectu & voto omnes bo-  
 nas leges eversas velle potest, etsi de facto id patrare non possit.  
 Injustitia Universalis exemplum est Lyfander, qui injustè  
 mendacij & dolipretium utilitate estimabat, de fraudibus re-  
 presens leonina nihil proficienti vulpinam assuendam repo-  
 nebat, Et pueros talis, Viros juramenti decipiendos esse dice-  
 bat. Erasmus l. i. apo. in Lyfand. §. 60. 61. Item Caligu-  
 la, qui palam nihil magis in naturâ suâ se probare dixit,  
 quàm impudentiam, i. e. quidvis agendi audaciam, Sueton.  
 in Calig. §. 29. Ita & per omne genus vitiorum volutatus  
 fuit. Ut superbiam, molliitiem, timiditatem, libidines, ingrat-  
 itudinem, rapacitatem, prodigalitatem, crudelitatem, menda-  
 citatem, &c. V. eundem §. 22. 23. 24. 25. 26. 27. 37. 38. &c.  
 Hac etiam de justitiâ universâ & legibus pro Ethicâ ma-  
 teriâ dicta sufficiant.

tion  
ere  
and  
re.  
li-  
tor  
are,  
∞  
Ho-  
r h  
pe-  
.

